

ننهجى الوطن فى النور

شعر

سمير الفيل

289

أصوات أدبية

أصوات أدبية

سلسلة أسبوعية

تعنى بنشر الإبداعات المصرية

الهيئة العامة لقصور الثقافة

• تتهجد الوطن فى النور - 289 - شعر - سمير الفيل

• الطبعة الأولى - إبريل 2000


باسم مدير التحرير على العنوان التالى :
11 ش أمين سامى - القصر العينى
القاهرة - رقم بريدى : 11611

المرسلان

رئيس مجلس الإدارة
على أبوشادى
أمين عام النشر
محمد كشيك
الإشراف الفنى
د. محمود عبد العاطى

رئيس التحرير
محمد البساطى
مدير التحرير
جرجس شكرى
سكرتيرة التحرير
إبتهاال العسلى





الحمد لله

الى صديقنا العزيز المرحوم

عبد المجيد

أعزاءه بكدها هنا

من روح الوطن الحليم

سمير الفضل
- دمشق -
2006/9/7

Samir - Fee/a
y akoo. com

إهداء

إلى أصحابي القدامى والجدد
بدون ترتيب للموت أو الحياة :

مصطفى الفيل

محمد علوش

علي قنديل

صلاح جاهين

محسن يونس

عبد الدايم الشاذلي

محمد كشيك

د. لطيفة الزيات


مصطفى العايدى

يوسف القط

محمد النبوى سلامة

فؤاد حداد

فى حياتهم شعر كثير، وزهور



نتهجي الوطن في النور

- أوراق منسية
- الأرض : فاس حديد
- وطن
- شاهد
- أغنية حب

أوراق منسية

مكسور

وفانوس الليل يبططق عتمة وضى

أنا قلبى واجعنى

وخايف أنطق أى

قدامهم لازم أبقى كبير

وصبور

واتكلم عن طاقة نور

ساكنة قلبى، ومالية كيانى

أنا أعدائى بيزيدوا

ولآ صحابى هما اللى بيقبلوا ؟

مش لاقى نخل أرتاح تانى على ضله !

العسكر خلعوا بياداتهم

فى المدن الزحمة.. ضلوا

وسط "ميدان التحرير" الواسع

سكروا... بعد ما صلوا

تنده تانى ياموت ليه على إسمى

تنده ليه وانت عارف

.. إن الصورة مش صورتي

ولا عمر ده كان رسمى

* *

أقعد ع الكرسي الفاضى

من غير ما اسمى

تقف على كتفى حمامه

وينام منقارها على يافتي

أنا أطق عياط

لما ألقاها بتشرشر دم

والطلقة كانت سكنها

م الأول

* *

من أول عمبول

ما اشتالتش زهرة
ما حضنتش وردة، أو نسمة
يمكن ساعة ما دُست اللقمة غصب عني
ما وظيفتش أبوسها
الضحكة بيطلع منها سوسها
بتنخر في الرجفة
تخليها ثبات
أنا واحد كان حي ومات
أنا شاهد - واقف على حيله -
في جبانة الأوقاف
كنت جرى فعلاً
لكني دلوقت باخاف
من ضلي
ومن بكرة
وم الشرطي

* *

اتصنت ع الليل . ألقاه هو

اللى عليّه بيتصنت .
ويميل بظلامه عليه. يغطينى
لجل ما تطلع شمس تعرينى

* *

الجيش فى الصحرا مكشوف
والإيد مهزوزة
إزاي تمسك كلاشنكوف
أنا قلبى يتهز من الذكرى
ويرمى القهر والخوف
الخوذة اللى فى اكتوبر لسه مرميه
صدت م المطرة وصهد القباله
الخوذة رمتنى على شتويه.
فى ثلاثة وسبعين
وسواعد الرجالة ..
كاشفين الصدر . وبيعدوا
مع الاستشهاد
لساهم يتوأعدوا

ويعلموا العلم الغالى
فوق التبة
ولما الريح بتهب الهبة
تزيح كل الأسرار
والقى الشهدا فى الحفر البرميلية
باصين ع الشرق بغل قديم
بيبصوا نفس البصة المليانة معانى
لسه رغم السنوات الخارصة سكانانى

باسأل وطنى عن الأوراق المنسية
عن الأفول الكاكي : ليه طوياه؟
و"الساتر" فى مدنا
ليه هى برضه هداه
أسأل . جاوبنى الآه
واشعر إنى وحيد وغريب
لكنى عنيد
أستنى أبص فى عيون البنت

.. اللى مليانة حنان
ألقانى أعود قلقان
ده لأن الشمس بتبعد عنى
والنيل ساكت مش زى زمان
بيفيض
والإيد ..
مش ضاغطة على زناد
أنا قايم أقطع كل راياتى البيضة
اللى مرفوعة جوايا
قايم أفرد موالى
وأواصل فى غنايا
وهاخطى السور
وما اخافشنى من العتمة
لأننى باحب النور!

الأرض : فاس حديد :

ولقيتني تابه فى المكان
باقرا الوجوه .. وماتقرانيش
بامشى فى جنازة بدون ألم
لسه الطريق ضلعة
.. يعتم فى الرموش
الضحكة للأطفال
وأنا .. لى العدم
الأرض فوقها .. شفت موكب للنعوش
وحدى بافتش عن ضيا .. للذكريات
فرع العنب .. دبل ومات
أخضر ده كان
دلوقتى اصقرت عيدانه
زى ما قلبى عروقه شددت
عرف السكات

والنبض خداع للصحاب
اللى بيتعتروا فى أحزانهم
وفى خيوط الزمان
فارس أنا
وبدون حصان
ماشى باجوب "الأطلس" الجغرافى
بسفينة ورق
لو التفت للخلف مرة .. اتشقق
ياخدونى للسيف
يطيح الراس
ويفضل للجسد : ذراعين . ورجلين
إنما الأفكار خلاص
راسى مخلص جسمى
مصمم .. لا مناص
إحساس يعذبنى فى حلمى
وصحوى .. فى جميع الفصول
إزاي تعيش بفكرتين

بروح نبى
وجسم إنسان
.. خلّقه من قلب طين
إنت بعيد عن السمو والسما
أقرب لطيش الخلق
فى لحظة نزق
لو التفت للمعاجم اتشنى
خلفى إيدى بتزقنى
صوت فى الأمام بيحثنى
” إياك فى مرة تشتري ..
أحسن تبيع ! “
باحطم الحكمة وروح الموعظة
أكون بقلب كما الجميع
نصه جروح
والنص لجل أعانق الفجر الصبوح
أنا بالتفت
فجأة وحسيت بالألم

شيء لا يُطاق
دمى بحور
لكن حواليا بنات
” أنا قلت حور ! “
هزوا دماغهم : ” آه .. تمام !! “
أنا جوه صدرى خدتهم
اتلطحوا بالدم. والأفكار
.. وحزة السيف
إنما .. انهض جدار

وشفت جنات من نعيم
بساتين فراولة . وماجحة
.. وكنوز من كُتب
أول كتاب قريته
كان
بدون سطور
تانى كتاب بدون سطور
تالت ورابع ألف

دون كلمة ولا جملة وحيدة تدلنى
جسمى القديم نفسه
وعقلى بدون كلام، أفكار، رموز
ضاع هيكلى الشباب
.. فبقيت عجوز
حسبت بانى فاضى، محتاج معرفة
صرخت
شقيت الهدوم
- " لأ .. رجعوني للتعب وللهموم " !
الخور بكوا .. ثم اختفوا
واتكرمشت بساتين ..
وجانى صوت .. يرمينى فعلاً بالجنون
- " إنت لعين
خد رأسك
اطلع من مالك مدهشة
عود يابن آدم
للتعب . للأرض . لعفار التراب "
وفرحت تانى بالألم . وبالعذاب

بسطور .. عنيا تقراها ف كتاب

زى ما اكون
راجع لأرضى باتولد
أنا من جديد
أبكى وأرقص م السعادة الباهرة
وارمى الذهب
الى خلبنى .. فى حودة م الحارة اتعترت
وقمت أعمل فاس حديد

قدمى زلت
فضحكت
ربطتها بقطن . وشاش
قلت فى سرى :
” لا عيش ع الأرض دى
لا بلاش !“

وطن

أهوى الوطن ده بالذات

لأن فيه شباك بيطل منه طفلى

وفيه قلة تروى الظما

ونخلة تستر جوعى

ويرقد فيها ضلى

هو ده باب السطوح

ودى عصافيرى بتزقزق غنا

وإريال الراديو بيتحنى

الخريطة مطوية فى جيبى

يا هلتري أنا حزين ولا تايه

ولا العيب ده عيبى ؟

أحب موال البحاروة بعودهم زان

بضحكتهم

تمسح الإجهاد من الأركان

وأكره السكات

وأحب العيون

المليانة غزل . لخريطة الوطن

وأعرف ازاي أشهق للمطر

وأفتح صدري للرداذ

القصايد العزاز

باتساند - أنا - على طوبهم

والخروف من جرانيت باعوزهم

واللسان الغريب

أنا وياه في صراع

لإن البلد بلدى

والرمل عمره ما يتباع

والدراع .. اللي حارب

.. ما يعرفش الضياع

مهما تقطب الأيام جبينها

وتهد الملل فى أوقات

هو ده دفتري : الطمى والميه الحلال

وهى الحروف راس مالى

هو ده النشيد اللي ما اتقال

وضيقة فتحات غربالى

يا عتبة الحارة يا معطرة هدمتنا

يا حنينة

وانتى بتلمسى أولى خطوتنا

أنا بافتكر ضمتك ليا

ومعفرة بالحنين والتراب إيديا

همس الزمن بيفوت

يفكرنى بزحف العنكبوت

ورعشة البدن فى البرد

وقلة القوت

يفكرنى بطلقة الرصاصه ع التبه

يفكرنى بريحه الأجه

الريح لما يهب هبه

يزيح الورق اللى دبله الغروب

فيصحنى القرنفل

ويبعثه من السبات

أحب الوطن ده بالذات

أحبه : أرض وسما وبحر

لأن اسمه مصر!

١٩٨٧/٩/٤

(١)

بدمك تطهر الصحرا من الرجس اللعين

وتفضل المدن اللي غارقة في الأنين

بتفضل سنين

شانقة ولادها على مداخل البيوت

بيروت ؟!

وإيه كنت أعمله غير السكوت

غير انى أحول كلامى قطن وشاش

أنا اللي ما قدرت أخلفه رشاش

كنت باحلم أطلقه

فى صدر اللي غطى وشه

.. وقت الشوف

وكبل الأيادى أدمى الكفوف

بعت - فى المنافى البعيدة - كل الحروف

كسّر القلم الشباب

لجمه بالموانع.. فأصبح كهل

بكى فى نص الليل

على الجيران والأهل

” ده انت عارفنى.. ناظرنى

فى الشمس .. تحت الضل ”

من عيني نزعوا الدموع

وأدبنى دابس وحيد

سكة مهانة وجوع

قالوا هخرج بيوتنا

أوصف لى كيف الرجوع

طمسوا ملامح بكرة

وده اللي جاى على مهل

” بكى وخذنى فى حضنه :

أنا ما بعت الأهل ”

*

(٢)

في عز الويل

اترسم موت

وطلقة في صدر بيروت

كان النخيل بينوح

كان نيلنا - آه - مدبوح

يجى .. ويروح

يدخلوه الحبس

يبص من خلف الزجاج

يطلّعه افراج

يشعرنى منظره .. بالارجاج

وبغيمة من مطر بلون الدم

بتطبع ع الباقية. فوق الكم

لكنه من حلاوة الروح

بيجرى فى القرى الحزينة

يجرى وينطّوح

يجرى وينسى .. ويفتكز ..

بيصفر لونه، ويهرب دمه
محترار أخاصمه، ولا أضمه
أخمش وجهه الأليف بالضوافر
ولا أخسس طميه.. أشمه ؟

*

(٣)

أدلى إيدى فى التيار
ابص صوابعى دم
" شيلنى .. خيبتى يا عم "

أنا أرتعب م اللون
صرخة تغوص فى الزحام
أهة بعرض الكون
أدى جميع الخلايق
ماشيين، ودايخة الراس
لكنها الحُراس
لسه جزمهم ثقيلة

وكان ما شيء جرى
وكأنه لسه بطل : دياب . وسيف عنتره
وكان لسه الخريطة
طاوية المعاني البسيطة
وكان لسه الساقية
والغيط . وحيط الجامع
بيشعروني بأمان !

(٤)

إيه يعمله فتى
حارب في جيش المملكة النظامي
ومسكوه ببندقية من فلين
إيه معنى كشف مليون أسامي
يرجع مقطّع .. من معركة "حطين"

* *

هل أرمى النيشان ع الأرض
ولا أشبكه ع الصدر

هل أقرا صورة الفاخة
أم أرمى فى السكوت
أنا لا أراك بترد
وانا على شاهدك
انا بانتحب .. وارجف
والتوهة بتاخذنى
أنا ارمى وانحدف
احضن حزنى الكبير
ابكى العضم اللى باقى
تحت التراب يستجير!

*

١٩٨٣/٥/٢٨

أغنية حب

"إلى مرفت... أيام الصبا.. والجمال"

بتحيرنى ضحككتك المفرودة

ترعشنى نظرتك الحادة

وعيونك فجر ما عدى

لسه نداه بيدردب جوه الصدر

حكاوى . وسحر آهات

الغمازتين

بيقولوا رموز. ويقربوا فى المسافات

دى عيونك

بتسافر للقطب تدوب تلجه

ويترجع .. تشتالنى فى الننى

اوعى تخطى . استنى

**

الشهقة فى الليلة حجر

يا خريطة ملو الجسد
دلتاك متشوقة لهطول المطر
بأوان

واسعة الأمانى
وضيقة دروبك
نابتة، من تطريزة توبك
كل زهور العالم
وغصونك

ضلة، من تحت جناين
عصافير بتشققشق
فراشات بتحلق

وعبير فيروزي الصوت
أنا كنت كتبت وصية
وفتحت كتاب الموت

* *

بابحث من تانى فى كلامى
وأمامى . أو خلفى . يمكن جوايا

فارس مهزوم . حالف ليقوم

ويدارى العجز

يتسند على ربح أمشير

أو على صهد بؤونة

* *

فى الجيش إدونا

مدفع باربع خزانات

وكوريك . وكمان أروانة

ودونا

ف أول خندق

وقالوا لنا : العركة بركة

العقرب لف

الهاون فرقع .

الدم فى عروقنا شف

مسكينة يا مجروحة الساق والكف

* *

بافتكر . وباحاول أمر

فى دروب النسيان
وباشوفك يا حبيبتي
قريبة بروحك لى
باتيقن إن العركة الجاية
هاملك خطوتى. ذخيرتى . سلاحى
صك الملكية . بالبيت . والشارع
راجع
وهاكون الأول والآخر
ورفاقى نفس ظروفى
لكن مش عارف
فعلا هاتخطى خوفى
ولا ...
يظهر إنى باطمئن نفسى
واسبح ف عنيكى المرعى الواسع
جبرى فيه غزلان
ماخيش قيد
وأنا ليه ما اعرفش باقابلك

من غير مواعيد
وباشدوف طيفك ورد وتغاريد
وبصدفة قمر الليل ان شق العتمة
فى ميعاده
وشموع انقادوا
مزازيك خاوطنى
وجناين جيتنى

* *

قاعد الف
وبدى أكسّر بالقبضة الدائرة
العالم حيرة وانتى يقينى
غطينى . اوعى تسيبينى
إلا بحكاية جيب الصحيان
لعنيه السهرانة
آه يانا .. يانا
ياريتنى اقدر اشرح

وباريت يا وطنى تسرح
فى الحلم
زى ما باخد شنطة سفرى
وجوه عنيه باهاجر
ما اقفشى على أى محطة
وباخطى غيطان الفلفل والشطة
كل المتاريس
الأندال . المتاعيس
الناصرين الأسوار . بنين الجواسيس
وعيون بتبص لتحت الجلد
وجوه خلایا البنی آدم

* *

الآن قلبى بيفرح
وبيعرف طعم اليهجة
والضحك بيملا القلب
بيتدفق مع نيل فى أغسطس
زايح كل ركام العام الماضى

حكمت القاضي

أدفع فدية

وارتكب الجرم المقبول

الجول. واضحك. وأنول

.. أملئ إنى آخذ بإيديكى. واخوض

.. فى بحيرة من ورد قرنفل

ونقوش فرعونى

مواويل

ويا .. ليل

آه منك مستقوى . وطايح فى الخاليق

يا شقيق الممالك . والغز

رفيق . السجانة ف عصر الفيديو

وشاشات التلفزيون ألوان : بال وسيكام

تعرفشى خل الفزورة :

" إذا "أوغلى" باشا جاله زكام

تترج المحروسة

ويزوره سناجق كل الأقاليم

وان مات فى الحارة "سليم"

م الجوع

ياخدوه للدفن ف نص الليل

يا ليل

يا واجع قلبى بحكاياتك

جوه نسيجها الدم

اتلم . وروح . مجروح . أو مقتول

يا ليل يا مغول

ابعد عن شعر حبيبتي

اتقسم اتنين

ومنين تيجى نسد ابواب الزمن

ان كان يمنع خطاويك

* *

عايز يوم مفروده ساعاته. وثوانيه

ليه باتعكز على ألى. وانا بافرح بيكى

ليه انا اكون وياكى. وباحلم فيكى

أناديكى

وانا ضمك جوابا

أوعى تفارقيني

جوه ف صدرى. أو بصة عيني

بانعلق فى فروع الشجر الاخضر

وضروع البقر الوحشى

امشى .. فى جناين من عشب

تحت جذع شجرة توت

توت .. توت .. توت

ومسير الحى يتلاقى

ومسيرنا يا ساكتين نضرب بالنبوت

ومسير ألقاها تضحك م القلب

وم الناحية دى تفوت

اتصنت نقر الكتكوت

نبشه فى البيضة

وأنين المسجون

* *

عالم مجنون . ومريض

لخبط حسى ومشاعرى
جعلنى أسير الضحكة المكتومة
لكن باهمس لك
والخلق اللى متدلى على جدك
مانع عنى الضحكة الخجلى
آه يا رموش العين
البرد الموسم ده خش لعين
ياشمس . بترمى الضى على الناس
ياوشم . حفرته على صدرى نحاس
دوران . باجرى . يمكن اشوفك
دوران . يا مسافرة فى اللحظة
ومهاجرة فى الأيام
هل ممكن دلوقتى أنام
وانا ساند راسى على حجرك
ومثبت عينى
ف بحر عنيكى السوداء

* *

مستكفى بأن الننى يقول

قلبي المشغول

الطائر طيران

سابق النخل الل بيقفز من شباك القطر

وسابق فيضان النهر

ولاحق بالفضة المسكوبة م البدر

* *

استنى

قولى حدوتك على قدى

ياما نفسى تعدى

جوايا

تسيبي عبيرك

خصلة من شعرك

منديلك

نخلك . نيلك

ده انا لسه باتهجي

أول حرف ف مواويلك

ما اعرفش من غيرك
كان يبقى غنايا ازاي؟

۱۹۸۴/۱۱/۲۱

رسائل منقوشة على جبين الولاد

- ندا الأرض
- الرحلة الأخيرة
- اعتذار لسليمان الحلبي
- عطش البرتقان
- خصومة
- سكة حضارة
- غنوة الطباشير

ندا الأرض

”من شهيد في حرب أكتوبر لأبيه الفلاح“

وبعد الصبر والفوران

وبعد الحسرة والتوهان

دموعنا ع الخدود سالت

وعدينا

ما فوق المية والألغام

ومدينا الخطاوى تجيب لغاية قدام

*

وكننت انت بطيبتك يا أبا جوايا

كما خوذتى هنا معايا

وكات بلدى بغيظها النادى بتعدى

وكان جدى اللى مات مقهور

هنا فى يدى ، دما بيفور

*

وحطيت القدم ع الجسر
لحظتها شعرت بمصر
بآلامها . بأحلامها
بترمي كل حملتها على اكتافي
وزاعقة في .. كون عافي

* *

بسقيتنا .. في غيطنا القبلي قاعدة تدور
بضحكة عيلي اللي ماشافش لبسه النور
بدعوة شيخنا ع المنبر
بعود م القمح شب اخضر
بحنية ضهرى وقت الكف مابيكون
.. حاضن فاسى
ببيت العيلة ويناسى

* *

عرفت صحيح
بلن البسمة غايبة من زمان - يا آبا -
ولا سكنتش شفايفكوا

ولا عدت ليتمكوا
ولا حتى رغيف العيش بيتدور
ولا التعريشة في المصلى
يزورها ربيعنا بتزهر
عرفت ساعتها ده كله
عرفت اكثر
أخويا ليه
بقى له سنين ماحطش رجله جوه مداس ؟
وليه الهدمة دايرة فوق كتاف الناس ؟
واختى ليه شوارها سنين بيتأخر ؟
وليه بالجمعة ..
.. نلقى بيوت ما فيها لبة بتنور ؟

*

وعدينا
وشلنا الرمل في إيدينا
أنا بوسته
وعفرنا الوشوش منه
وهللنا

فى لحظة ما العلم رفرؑ . وعاد للشط
فى لحظة ما انتظارنا المر .. يا آبا .. اخط
علم بتدوسه أقدامنا
وفيه نجمة غريبة بتكوى فى جراحنا
وبصينا لقدامنا

* *

وبصيت - يا آبا - ما.اتهزيت
لقت مدفع بيضرب صدر اخواتى
بيضرب ابنى الآتى
وناوى يوقف التعدية
قلت رخصة يا حياتى
ولجل النصر لازم ادفع
انا اتعلقت فى المدفع
ضرب صدرى العفى انقطّع
لكن موقعهم اتولّع ..
وعدى كل اخوانى
ولو أقدر اعود تانى
أعلق نفسى . واتفرتك

اعلق نفسى . واتقطع
ميتين مرّة .

عشان النيل معلمنى
أفيض بالدم ولا أبخل
عشان الغيط معودنى
عيدانه الصبح فوق تطول
عشانك إنت وبذاتك
ولما كنت فى شبابك
وضعت الروح على كفك
وقلت لمصر : يا بلدى
نادينى . دى هيجابك
وانا - يا ابويا - من صلبك
وصدقنى

بالاقى نفسى دمع وفى العيون جارى
وهدمة فوق كتاف جارى
فى رمل اتداس وعاد تانى
فى راية فى السما شابطة
فى إيد هابطة

بتضرب لجل سينا تعود

*

ماخزنشي

وكفكف دمعك الجاري

أنا ابنك - يا آبا - ماموتش

وكلمني

في حين ما بتحضنك أرضك

ولوز القطن يتفتح

واختي جهزوا شوارها

واخويا تشتتروا له مداس

ماخزنشي

وقول للناس

أنا ابني مات وكان فلاح

مع موته . ومعاه آلافات

يا مصر الليل خلاص انتراح

يا مصر الليل خلاص انتراح

الرحلة الأخيرة

” إلى صلاح عبد الصبور ”

اتعدت كل المراكب
تطوى قلوبها في الرجوع
وهي شائلة الرزق وافر
اتعدوا الولاد يعرفوا صدورهم
يفنوا للقمر طالع. معافر
اتعدوا النسوان يواروا الباب
يبصوا ع اللي راجع في خجل
وف صدورهم بحيرة من أمل
والفجر عود نفسه
يحضن الخطاوى الطيبة
ويكون رفيق
كل الشطوط موجهها بيوصل
مهما كان تقلك ياضيق

* *

اتعود النيل اللي كان فيّاض

يخش بلدنا مليان بالخلجل

واتعود النخل النبيل

يشرب ميته من سكّات

وتشرب القلّل

والناس فوقها خيمة الانتظار

في كل بيت شبّاك

وف كل حارة مغنى برّابة

يحب حارته، وحبّه صباه

غنى معايا لفارس "دانشنواي"

الراية كات مكسورة

مغروس في جنب مصر: الآي

غنى وقول مواويل

ده ابن ريفنا العفيف

"زهران" قتيل !

*

انعودوا الشعرا

يرحلوا بدون وداع

يتركوا من خلفهم المغنى . والأوجاع

وتطلع القصائد جُوب حوارينا

واحد نقص م الصف

خطوا لقدام . فى الزحام

آدينا .. آدينا

فى وجه الشمس مفرودة أبادينا

مبدورة فى الغيطان الخضر

غناوينا

رجلينا فى الطين : القرايحى / الحزين

/ البكر .. منبعنا وعاطينا

منديل الغموس والفكرة

فاكك العصاة السوداء ..

.. من على عنينا !

*

سكت الكلام وياك

وعينك تبص هناك
للطفل يحبى فى الزقاق
والأب على كتفه الهدمة دابية
ينطق كلمته بدون ذواق

* *

حببت ، وبحت ، وقلت
صدرك يا صاحبي حنون
” يا دى الألم فى القلب
فتحة وكسرة وسكون“

* *

واحد من الصف فاتنا
وبلدنا محتاجة
إحنا بنكتر .. بنكتر
حتى حروفنا تزيد
حناجرنا لا تسكت
إلا بطلوع العبد !

*

لسانى كما لسان صلاح
اللى شرب من نيل بلدنا
ومن صلابة صلاح الدين
عربى وמש عبرى
كلامى فى الصباح فوّاح
فرحة العودة . ومَرّ الأنين
أنين بيوصل من تحت ضرسى يكون
نفس أنين "عربى"
متقيد الأيدي .. مسجون

*

ابن الزقازيق
البلد اللى بعنت فارسها يشق طريق
ويفتح بالعزيمة مجرى للثورة
يوسع لبكرة
ويجدد الخصرة
يطبطب بالأيدين ع الضهور
.. اللى كانت موطية ترتفع

على الكتاف اللي محنية .. تتعدل

على العيون الخابية

.. يصبح لها بريق

* *

ابن الزقازيق

الأخ .. والعم .. والشقيق

رغم شيبة الراس

كان أكثر جيلنا شباب

انكسر

وانغرس فى الصدر ألف حراب

ياشعرا .. ياشعرا ..

أوقفوا النزيف

فكوا قيد عرابى

ده دمه - آه - مهدور

أيام تلف . تدور

وبترجع الندهة

ياشعرا .. ياشعرا

فكوا إيدى الحروف
خلوا كلامكم يقلع "الجرفنة"
جوه الخوارى يطوف
خلوه يغنى ع المصاطب للفلاحين
ويدفع الدين
ينور السكة . بمصابيح الحقيقة
ويك ضيقة
خس بيها صبية
.. حبيبها غاب ولا عاد يغنى لها
آدى الحبيبة أسيرة هناك
مين فيكوا يعدى لها ؟
* *
آه م السكات .. يغور
خنجر يشق القلب
آه م الصديق لما يسكت صوته
(أنا ابن عمى حب
وكات عشيقته مصر

عشائها فات قوته
صَبَحَ عليها وحضنها
راح وطب شهيد
ع الصدر دمه علامة
وف قلبي نار وقيد
بابكي ليوم القيامة
ده كان بيكتب شعر
اخضر كما الموال
كان كتفه حمال .. وكان
ماشى فى سكتنا)

* *

يادى الأنين ، وانت فايتنا
لسه طويلة يا صاحبي سكتنا
لون الرماد بتطل صرختنا
لكن ضرورى ضرورى تعالى ضحككتنا
و "الناس فى بلادى"
جمعهم الفرحة والمزايك

” أقول لكم ”

على سطح بيتنا ديك

يدن فى ساعة الفجر

يادوب عشر مرات

يتوضى أبويا ويصلى

يدن الديك بإصرار

حتى طلوع النهار

* *

باشوف ريشه زاهى

وف ندهته

يشق عتمة الليل صباحى !

*

أنا اتعودت عليه

صار انتظارى ليه أول

ومالوش نهاية

فى الليل اقوم اكتب

اخبى انكسار جيلى جوايا

اضحك . بتبكي حروفي
تتلخبط الآية
أعد الشعرا في بلادى
واخذهم في حضنى لطلوع الفجر
ينقص مُحارب
من برودة الصمت . ومن ارتجاف البدر
ياخذ سلاحه محارب
مضروب وضارب
ميدان القتال : الحقيقة . والحياة !!

*

الآهة مفرودة باتساع الفجر
ناشفة زى فرع جريد
الفجر طالل من بعيد
والجديد
إن اللى غاب
باقية حروفه ف صدورنا
ساندة - صح - ضهورنا

رافعة قورتنا

وموسعة الخطاوى

منورة فى سكة الجموع

* *

اتعودت المراكب

تطوى قلوبها .. فى الرجوع !!

١٩٨١/١٠/١٦

اعتذار لسليمان الحلبي

الثورة بالنابيت

الهوجة بالأحجار

داست حوافر الخيل على السجاجيد

الجمع الثوار

من فوق على المدنة

نده شيخ كان لابس العمة

يارب .. ياربنا

تزيح لنا القمة

الخلق متلمة

تتصدى لبنادق الفرجة بالعُصيان

الازهر كره وش الأعادي موت

وأعلن العصيان

كل المجاورين

حطوا المصاحف تحت باططهم

وخرجوا بالألوفات

(شرجاوى) مات

ضربوا البارود فى الصدر

كان راعع وببصلى

- "يارب يا متجلى

إسند زهورنا .. قوى عزيمتنا"

وعيون من الشبابيك بتبص ع الحاصل

تخلع أساور من الذهب وتبيع

الكل حامل ع الكتاب هم

اتفجرت بمبة حديد

اتفرقوا فى الحارات

.. رجعوا واتلموا !

حطوا قرآنهم على صدر الشهيد

حلفوا ينتقموا

خرجوا الميدان

الضرب فى المليان

تنهز أعمدة الرخام
تتشقق الجدران
والقبة تعلو بالندا .. والآذان
طالع ما بين الدم والدخان
” هربوا المالك بالذهب والحريـر
إحنا سكتنا كثير
ويا ما ورونا
ميلنا .. ركبونا ..
من بعد دي العركة
البلد .. احنا اللي نحكمها .. “
الدهشة تحت الحواجب .. في العيون
ده فعل مش أحلام
” بولاق “ بتصنع بارود
ومشمرة الاكمام
” باب الفتوح “ حاطين أمامه كمين
- ” ياربنا يا معين
انصرنا ع الكفار “ !

* *

طابور معدى بالجياذ مزهو

الشُّقر . حمر الوجوه

فتى نحيف .. وقفوه ..

- " فين السلاح خبوه ؟ "

خدهم وراه من زقاق لزقاق

شاور لهم بالإيد

وف لحظة كانوا وقيد

لنار بتنزل من كل بيت فى الحى

الشعب واقف حى !

فارد بإيده كلمته

طالع يقول قولته

- " الأرض دى أرضنا

ما نرضى بمذلة ! "

شرب الجريح آخر شربة م القلة

وبطرف عينه نظر هناك لبنت الجيران

من خلف شيش بتطل

” - يا جنرلات فرنسا .. أيه الحل ؟ ”

نصبوا المدافع فوق

على تبة القلعة ..

ضربوا بعماهم ع العيال والحريم

الموت دخل فى الأزقة

خلع الأبواب

اتشقت آيات .. على حيطة الأزهر

غلب البارود .. شجاعة النبوت

* *

وكليب المنفوخ صدره ماشى بيعاين

يلقى الشباب مقتول

وفى الإيدين نبأبيت

يشرب إزاة النبيت

ويفرض الأتاوات

يسجن شيوخ عمرهم فى الصحن بيصلوا

يشنق ولاد الصعيد ..

.. على الوطن طلوا *

يمشي بمداسه فوق كتب الازهر
فرعون . ومتجبر
إيده على صدره . وعينه ع الدكاكين
مقفولة مش فاخة
يرفس فى جرحى بيكملوا الفاخة
كات البلد فاخة شباك انعتاق م القهر
والجزية من دمهم
بيدفعوا الشبان
آدى السما بارحة ..
زراقها فيه م الحريق عواميد من الدخان
فكره البلد بلده
خدها نكيه . يدوس فيها بالساهل ؟!
” سليمان “ وشاف منظره
ساكت ومش قادر
” سليمان “ رهيف القلب
عمره ما كان قاتل
لكنه جز على السنان .. دمّع

جنرال فرنسا ماشى متلمّع

على صدره ألف نيشان

والطيلسان محبوبك.

يضحك بعلو الحس.

يدمى الضمير الشوك

* *

م الشام وجيت اتلقى علم

على إيدى الأزهر

ليه ألتقيه دم وشظايا .. وموت

أنا حلمى بيتكسر!

* *

لكن بيلمع فى عيونه بريق

يتسور السور فى المسا الاخضر

يتخفى فى جنبنة سارى عسكر كبير

العقل فى التفكير . والرب فى التدبير

يتحسس الخنجر

يرتعش م القلق

بيغسله اللحظة : الانتظار والعرق

الانتظار

حزة السيف على الرقبة !

* *

مصر باينة تبكى وتنهنه

كل الحوارى طافية "اللىض" ساكتة

الكلمة مدبوحة . ومش باهتة

يتسحب العود النحيل

يطلع الخنجر

يارجفة الدم . وبارتعاشة الأطراف

بالخوف يحس . وبانتفاض الشام

- حقيقة مش أحلام -

غرس خنجره . وما خاف

صرخة ندوى : "كليب مات !!"

*

تعلم البيوت بالموت

تزغرت القلوب . وتتشفى

والفرحة جرى في الأزقة
ترمح .. وتتخفى
وانت يا عود أسمر : ضحية وانتقام
رعود في ليل الشتا
بريق في حالك الظلام
جرت الخيول في السكك
تنصت الخطوات
صوت في الآذان :
- " كليبر مات "
قامت بلدنا من تاني
تفتح بإيدها بابها اللي صدى
وتلمع القناديل
وتعلق المناديل
ترقص ورا الأبواب
خايقة الفرجة . والعسس . والكلاب

* *

وانت يا عود الزان يجلدوك

ويقطعوا لحمك

ويأكلوه نى

لكن الوطن قام حى

* *

ديوك تبج الصوت

تنادى زيق م الضى

وانت يا عود الزان

ليالى القهر قدروا يعلموك

إنك خارب الغول

* *

ما أعظمك من خنجر قدرت تقول

ما أروع الكلمة فى ليالى السكات

يا صاحبى باللى بعث الروح

ما أنبلك ..

كان الضمير الحى جواك

مقتلك

وفيه حياة مصر . عشقك الأول

يا ارحال الشام . حلم حريم
نفسى اقبالك يا سليمان واسألك
إزاي قدرت ترفع الخنجر
وانت كنت جعان
قتلك كليبر
ساب برنا .. بركان !!

١٩٨٢/٤/١

عطش البرتقان

” إلى أطفال يافا “

يافا متوضية

فاردة سجادة الصلا ع الشط

ف إيدها بندقية

حام الحمام . وحط

كانوا البراعم يترنمو بأغنية

يغطوا عنيهم بالأيدى متحنية

دم شهدا

أبيض بلون البداية

أحمر بلون الدم

حط إيدك يا عم

إسند على كتفى .. وطّل

شام هناك ريحة البارود والفُل

سامع بوندك صرير القيود

الطير اللى اتفزع وهج
بيرج الأرض رج
وحروفنا النبىة
منحوتة فى البيارات . وجاعيد الوجوه
احنا ان نسينا نتوه
وان شلنا قتلانا على الكتاف
وجوه القلب
بقينا !

*

يافا متوضية
والقدس فى الحراب بتصلى
خالعة المداس .. والقلق
جبهتها فوق الأرض
قايمة من بدرى تأدى الفرض
تمسح الإجهاد
وتغسل وشها بالضى
صوت الإرادة حى

أطفالها رافعين قبضات

فى وش الموت

وداع يا سكة سكوت

حجارة تتحدّف وتتخلق رعود

الأرض لازم تعود

تبارك الخلاق

وبث فى الضعف الصمود

* *

أسلاك وشايكة

تنزف فى قلبى والوطن ضايع

لكن يا أرض يظل ليكى الصوت

أطفالها رافعين

قبضات فى وش الموت

أطفالنا .. أطفالنا

رصاص بيئز .. ينقص الاولاد

نشد قامتها البلاد

* *

بلاد تشم ألود . وتعطش للبرتقان

على تلال من عضم

بتترعش آية من القرآن

صورة حصان راح لشمس الميلاد

الأرض ليها عبير بيفوح .

وزهور زنايق ندية

و " يافا "

لسه شايفها متوضية !

١٩٨٢/٥/١٣

خصومة

”إلى ولد مجدع“

خاصم النيل الفرات

خاصم النيل السوياط

ووقف غريب

فى أرضه يتلقّت

نده السواقى نده

طلت وما اهتمت

فرت الجميزة من وشه

كان الألم برسيم ويحشه

يرميه لماشية هزيلة بتدوسه

وانت يا نيل راكد . مابتفيضشى

الناس مابتنامشى

* *

كأت الخبول جئرى ومذعورة

كأت القيوه فى الإيدىن

من ورا الصورة

* *

ولد .. وحب الوطن

فك رموز الفجیعة

باتت بلدنا ع الشوك بتتقلب

نقلت علیها الوجیعة

بص بعنیه .. واختصر

كل المسافات الوضیعة

وشد زوادته

قال لأمه قولة بمواجع

رايح .. ومش راجع

لكن الوطن اللى ضایع

بكرة یكون راجع

كتب جوابه , وأرسله للنیل

ونسى یلرزق علیه طابع

* *

قال لحبيبتة الأصيلة

جل تعود النجيلة

لازم نك قيوده

وبكرة لما يعود . فى البر شادد عوده

بيعت نسايمه العليلة

شميمه لولادك

وفطميههم علامك

ما باليد حيلة

الى مسافر لها

من بدري رقدت عليلة

دواها عارفه. وحاجبيه

حاسقها تشفى . واموت

يوم لما اغيب عنك

هزى ف شجر التوت

وغنى غنوة "ياسين"

ياسين يا قلبى الطعين

غنيت في وقت البكا

أيه خدته غير الموت

* *

وصانى احكى لك منش عارف

واختصر زيه

كل الرموز والحبكة والدهشة

غاب

وساب في قلبى الضحكة . والعرشبة

عمل اللي كنت عايزه وعاجز

خطى في لحظة كل الحواجز

وانطرح جسده على الأسفلت

قفل في جوايا

بقايا الشك !

* *

النيل اتلفت له . وشاله

والغبط الزتوني اللون

غطاه بشاله

* *

نظرة عنه الى متحدة

جدلت مشنقة للعدا

وانا العاجز في ساعة الإمكان

على الخريطة تابه

محشور في عقارب الأزمان

مثن قادر احكى حكايته وابوح

ولا قادر افتح صدرى

أورى لاولادى الجروح

* *

تسلم إيديك ياولد

واخبي بقية الحروف فى الورق

احلامى م الانتظار تنسرق

باعصر دماغى وافتكر

الضى كان راجل ويا التزيف

وكان أسود بكرة

لكنه انبثق نافورة من ألوان

وفى الإمكان
صرير القلم يقول
لكن جسارة القول بتضنيى
تلون سنيى
بالعذاب المستحيل
الليل الكحل جوايا راح
لكن لسه ما انتصبت الأفراح
لسه انكسار امبارح المقتول
ولسه بيسنوا الرماح.. المغول
والقلعة .. لسه حوالىها حصار
ما يقدر عليه يا صاحبي
إلا ولادة نهار!

* *

١٩٨٢/٥/١٥

سكة حضارة

‘ إلى د. زكي نجيب محمود ‘

الأرض دى حبيها جدى

وابنى الصغير

بيحبى على ترابها المندى

ساعة ما تدعك عندها الشمس

تناوب

يصرخ المنشار

ودقة المسامير بتجاوب

والضهور اللي اتفردت لساعة ليل

تبتدى موال الشقا

فتخجل بحور الخليل !

*

الأرض دى باحضن ترابها

واشمه عرق

تاريخ كفاح طويل
كتبه جنود "الكامل"
لكنه اتسرق
وجمّلوا به المتاحف
بدل الولاد ما يقروه
وفى الفصول
اللى ليلها مناكف
بالصوابيح النحيلة. يفروه
*
كنت شريد فى الشوارع
وكان ممكن أتوه
ساعة ما باتذكّر
الفرجة يتسللوا تحت جناح الليل
يتسوروا حيطان الجوامع
ويقصفوا سعف النخيل
ويهدموا القبة خضرة
لأن الوالى نام بلا حذر أو حيطة

اسأل الخلق

ع السكن والوطن .. والخريطة

*

تاخذنى عيون العسس

والإيدين السناكى

تستجوبنى تحت البواكى

تطردنى فى البرد بلا مرسى

ولا مينا

كانت أبجديتى مستباحة

وأشعارى حزينه

*

لكنه بوجهه الأثير الملامح

طبطب بإيده على كتافى

كان راكب حصانه اللى راح

فى سكة حضارة

نخيلها بيفرد الضلة

دى زهرة غرسها

دى كمنجة هز أوتارها
وده شباكاه . عليه قُلة
واللى بيجرى يم الغيط
فى "ميت الخولى عبد الله"
طفل شاحب الوجه . عذب الصوت
لكنها السنين بتمر
واللىالى تفوت
يصبح الطفل الصغير
ضمير العصر

* *

وشمعة تنور
إذا ما دهمت العنمة حوارى مصر!

*

١٩٨٦/٤/١

غنوة الطباشير

’ إلى معلم ابتدائي ’

في لحظة ما الشمس تنزل
تنقر بضيقها على البيوت
في لحظة ما الأيادي الصلبة
تعزق .. أرض خضرة ف ريف بهوت
والعصافير الطليقة ترح
في فضاءنا الحبيب
ويفوت ببيع الحليب
على الأبواب يدق
وقتها فيه ضى يمشق
.. الظلام

* *

باسمع دقة الجرس

باحس بالونس

وبافتكر يا معلم مصر
زى ما افتكر الآدان
وانت جوه الفصل
سوى كنت فى البنادر
أو بعيد .. بعيد
فى الصحارى والبرارى والنجوع
رافع راية الإصرار
ما يهمك لو حتى يفوت اليوم ، جوع
إنما يطلع نهار
وتوصل كلمتك للولاد
اللى هما
.. لازم فى بكرة على طول البلاد
يمسحوا الإجهاد
ويبدلوا التقطية
يبدروا البسمة على وش بلدنا الحبيبة
بلدنا المداوية الطبية
بلدنا الحنونة

اللى بخطوطنا فى كراسات الولاد

بنحط أول طوبة

ويعلا البنا .. عالى

أنا ابن خالى

كان مدرس ف ابتدائى

سنه سننى

لكن فيه رزانة الشيوخ وهادى

كان يحط إيدته على اكتافى

ويبص للفضا ، يلمح

بكرة جاي بلون الإخضرار

كان يحب الضى . يهوى النهار

يحلف بالكراسة، والقلم ، والكتاب

إن المعلم يكفيه

راحة الضمير . ومحبة الإله

كان يحلم كثير، لكنه عمره ماتاه

ويوم ما راح الميدان، فانتنى وراه

غاب .. غاب ولا رجعتش

حسيت بأن الوطن له فقيـد
وشمعة كانت في الظلام بتقيـد
وإيد .. بتنشر العلم
تبدر حروف المعرفة
نقاوى خير
بافتكر الكلام

* *

ساعة ما القلم يكون له صرير
أحنا بداية المشوار وأول المصير
صرف الأفعال :
كان .. يكون . صار .. يصير
علموا الاولاد حروف أعظم أبجدية
وفتحوا قلوبهم والعيون
(ضمة وفتح وسكون
يا ألم في القلب. يا فرحنا المكنون)
كون في الأراضى زرع
وف المصانع تروس

وف الوجوه عيون
تبتسم لى الدنيا
ساعة ما التلامذة يجروا بالشنط
يسابقوا العُفار

* *

هما دول اللى من بكرة يكملوا المشوار
ويكونوا شعلة نار
ويكونوا وردة على جبين نهر
وضحكة لبلدنا الحبيبة
بلدنا العفوية : مصر

* *

أبجدية ندية، طاهرة، بريئة
لكن جدورها حكى نضال السنين
عم (النديم) اللى كان يجوب مصر ، يولدها
ياخذ بأيدها
يخطى الحُفر والصعاب
باشوف فى عيونكم

تعب الليالى . ومشقة السنين
حروفكم تضوى
ميم . صاد . راء
يا عظمة الحروف . يا بكاره الأسماء

* *

يتهجوا الولاد . يكتبوا
على الصعب - بالعلم - يتغلبوا
إيدى على إيدكم
وكتفى بيلامس كتافكم
آدى بلدكم قدامكم
قوموا .. وصلوها لبر أمان
علموا أولادكم الحروف الأبية
آدى طريق واضح :
كتاب . وغصن زتون . وبندقية

* *

إيدى على إيدكم
بلادكم

عاقدة الأمل عليكم
وانتوا شايئينها ف عنكم
ودايسين
.. بالكلام السكوت

* *

كل ده باشوفه
ساعة ما الشمس تنزل
تنقر بضيهها على البيوت
في لحظة ما الشمس تشرق
تنقر بضيهها على البيوت !

* *

١٩٧٨/٤/١٥

تقاسيم الحزن والفرح

- بتارين
- شعاع
- الفكرة
- الوصية
- حارتي ساكتة
- أسود وأبيض
- قلبي اتوضى

بتارين

فى العالم الحزين
أبو البتارين إزاز
والمطر رذاذ
والخواجز الرخام
باسمع نحيبك فى الزحام
ارتعد
واحس بالمسافات تدوب
وبالفصول تمر
ودقات القلوب
بالحجارة من فوق الجبل
تدرب ع الطريق
أحس ان أنا الغريق
وعنيك شطوط بتبعد

مش طوق نجاة
أحس إن الآه
على طرف اللسان لسه متعلّقة
باحس إن اللقا
مكن.. ومش مكن يتم
أحس إن صدر الأم
صار أدفى من امبارح
احس إن النخيل طارح
بلح أحمر
وحلم نشتهي
باحس بالبداية
.. والقلق
امسح بطرف كمي نغمشة العرق
أدب بقدمي في العتمة
أحاول افكر
من كام ما قلمي غنى ع الورق ؟
من كام ماقلت الشعر

لكن جوه قلبى اتخزن
ومرة لما صاحبى اندفن
بكنت عليه كل الشوارع
والوطن
سندت كوعى على شاهده الرخام
نزلت دموعى فى مقابر "الإمام"
ومشيت فى طوفان الزحام
.. ألفت .. وحيد
إيدى بتبحث عن رفيق
أو عن حبيبة
خريطة للوطن
بيت للسكن
شطرة من الشعر
أو مطلع قصيدة
تمسح الأحزان
تاهت خطايا ماالتقيت
غير نورسى الحزين فى الشط

كان بيرف

قلبي قرب يكف

عن الخفقان

وريحة الدخان

شميتها فى الشوارع والمدن

اللى بلا صحاب

* *

الكل سافر لبلاد البنكنوت

الكل سافر للصقيع والموت

والدم ع السونكى لم يجف

وداع للانتظار . والسكوت

شفت العروق خلف الجلود بتشف !

* *

الكل سافر . وبلا حس البيوت

صاحب ترك لى نبتة زرعها من أسابيع

وكل يوم أفوت

أبكيه بقلبي الوجيع

وجنّة الكلام ع الأرض مرمية

أنا شلته بين عنيه

إنما

حاسس بحزن فرعوني قديم

وبحوافر الممالك فى ليل القاهرة

وجباة الضرايب فى الأقاليم

يا فرح لا تسافر

يا حزن لا تستديم

* *

آدى الحجاب مزقت أوراقه

وباشرب ميتة يمكن أروق

والشوق

بيرسم سكتة . وحدوده

دون قيود

ولما بانام

باشم ريحة البارود

ندهته : اتساع عيونه السود

أريح الراس على مخدتي

أحاول انسى

إنما

فى العالم الحزين .. الملان أأغاز

كل شىء يختلط :

الدم والمية

الرمل والجاز

وسط الضجيج . لا حياء

إنما إنحياز

فى العالم الحزين

أبو البتارين إزار !

١٩٨٦/٢/٢٢

شعاع

” إلى روح الفاص المطلبعى : يوسف الفط ”

فى العتمة يفلت شعاع

فى العتمة ناس تبكى

من شدة الأوجاع

تسمع أنينها يفوت

يرعش فى شارع حزين . وشجرة توت

فى العتمة

أحب الشعر . بكارة المعنى . صرير القلم

تدمى شجونى الورق

أكتنم فى قلبى الألم .

* *

دى صفحة بيضا ولا دى خفقة علم

بين السطور

الوطن باشوفه يتبدّي
قُلة ، ونسيم بحرى ، وغلة
هامة مسلة ،
مصلّى .

نوارس بحر ، وضلة
ضحكة لابنى الصغير
ورشفة م القلة

* *

ده حلم زارنى وفلت
زى العيار انضرب
لكنه فات لى الصراع
ساب الصدى ، والصوت
وجدار بيتنا اللى ضاع

* *

بيتنا العتيق .. ابو عتبه من جرانيت
بيتنا اللى كان المغنى والحواديت
الجدة ، والعفاريت

أبو سور نعدى بجسدنا النحيل منه

وغيرنا مايعديش

من يوم ما باعه "الوالى" للأغراب

صار عُصاة جوه القلب

رغم الحنين

حُط ودانك على صدرى

آهين يازفرة أنين.

* *

قديم ولونه بنى عتيق

ماسك صديقى لسه صندوقه

حافى القدم والشعور

كان حاضنه من شوقه

وانا لوحدى

لكن جميعهم فرادى ؟

(معقول ابتدوا من بدرى ..

حرب الإبادة ؟)

ابنى الصغير محمد

من فصله جاب لى الورق
وبايده كشف الأسامى
خباه فى عبه. ماوقفشنى قدامى
شفته بيبكى . وشه كان مخطوف
ولما خرج الضيوف
حضنته . فسألنى
أنا اتخرست ساعتها وكأنى
باسترجع حكاية جدتى لأمى
الدم ده دمي
اللى فى سينا غسل الرمل بالسنوات
اصحى وإبات
التقى الكون بلا بوابات
وحتى كل الصور
مرمية فى الطرقات ..
انا دمي مية ..
ولا لسه دمي حامى
ورينى كشف الأسامى ..

* * *

تنقلب الأوجاع ، أسير تايه

خطوى كسير

لكن . جوايا فاهم الحكاية

الآية مقلوبة

مين يعدل الآية ..

* *

كله انهزم يا صاحبي ..

إلاك ..

باللى فى عز العتمة

قدرت تفلت شعاع

فى اللحظة اللى افتكرونا

إن املنا ضاع

* *

وف طلعتك للحق

كان للسكوت طعم

وللألم معنى

وكفاية انك قدرت بالموت . جَمَعْنَا !

الفكرة

”إلى ضاحى عبد السلام.. وسامح الحسينى.. امتداد الإنشاد..“

الفكرة زى السيف على راسى

وصهد خط الاستواء

الكلمة عاجفة البدن

والضرع ما بيدر

.. حر . كأنه الجحيم

المعنى يضمنى

هو الكلام الفصيح

بياخذنى فى حجره

بيحمينى

* *

لكنى بابكى الوطن

والخارطة مفرودة

الراية على طول البلاد مطوية

وأدى السما سودة

وبيدب الخرص

راس الخليفة التقى ملفوف في قلب بساط

في كل حارة فانوس يطفوه العسس

وف كل بيت .. كان عياط

لكن ولد حافى فقير

بالكم مسح الدموع

رافع ف راسه

.. وحلمه .. آه .. موجوع

ماشى وخت الباط

كسرة من العيش

وعود كرات

بقدونس اخضر

وفاخ بالصواب كراسه . يتهجى

عكا بتقفل الابواب

.. فى وش الفرجة

كان العساكر بينلها

وطابت الماخرة

والمدفع اللي دمر البيوتات

خلي "عويضة" مات

* *

لكن "منيرة" بتفرد شعرها وتفوت

الموت قصاها تعبها

وكفوفها تتحنى

النيل ميعاده جه

ولا زى عوايده غنى

كل اللي عبوا ذهب

هربوا ، وركبوا الجياد

- "بعودة ايام القهر ياسادة !"

كالعادة

هربوا بجواربهم

على وصول أو وشك

بركان يا صاحبي فى صدرى يتحرك

والدق ع الابواب هنا .. خافت

” - ولّع كانون الخطب

خليه على قدك “

البت شافت وجوه حمرة

وأكيد خافت

* *

كان اللسان معوج

وزراير العسكر بتتلّمّع

الشيخ على المنبر . يادوبه بيطلع

وقف الكلام فى الحلق

قام دمع

* *

يا اهل الكنانة

بلدنا دكانة

آدى الشباب عاجز

آدى الشيوخ بيموتوا ف امبارح

* *

كان يرتعد . والبصّة تخرق جدار

يهتز عوده النخيل

والناس يترفس خجلها

الكلمة بتفح نار

وضروري هيقلولها

* *

صف العساكر بيدبوا بسواري

كل الحوارى منداسة بجزمهم

طلع من العب مصحفه . وعيط

والخلق شهقوا

شريان بينزف . والدم بينقط

* *

لكنه آخر الصلا

دعا إن كل غريب

يطويه ردى أسود

وأدى ست عجوزة قاعدة بتعدد

- "يابن قلبى . امتى بس تعود

أوهب سنين العمر . بيها أجود
يابن قلبي . النار ما انطفأت . عميتني دخانة
مفتوحة ضبة ومفتاح .. الجروح
والخلق زهقانة "

* *

بلدنا عطشانة
والقلة متعلقة في رقة السياف
ست عجوزة قاعدة لجل تنوح
تدلى إيدها مجعدة في النهر
الحوص في سلتها
خطه فوق القبر
- " من شهر بيتنا ينام من المغرب
العين ما تغفل لحظة بالراحة
كل العصافير في العشش تبكي
والدمعة فضاحة

* *

دى راس بتخرج عرقانة مبلولة

ودى إيد تشد الجسد
النظرة مذهولة
الملح لا بيض رشوه فى ليلة السبوع
- " والبيضة عشرة دينار
الموت .. وناس بتجوع "
النيل بيفضح جسوره . ومقياسه
النيل اللى طول عمره
.. بيفرح ناسه
والخلق تطلع له بصبيانها
ترمى بناتها تستحمى بطميه النضيف
لكن شكله مخيف
وبيوت على ضلها بتتساند
* *
هى دى صورة الأمس
ولا ده شكل اليوم
فيه بوم
.. بينعى النخيل

وقوم يلموا البلح
قلب العيال الجرح
كان نفسى يفرح فرح
لو بس شمس الشروق
تميل .. وهو سمح

* *

إدن يا عمى "عويضة" لجل الصلا
إدن بعزم الصوت .. وهد الخلا
إنده بصوت مسموع
كل الغناوى ماتت بحسرة جوه الضلوع
ماكانش القاتل فقر ..
.. أو كان جوع
ده كان الخلم دوسنا عليه
إنده يا عمى "عويضة" .. عرفنا الداء

* *

الشمس متعامدة على السرطان
بعيدة ع الاستواء

بيوت بتفتح كل شبابيكها
يخرج ولادها يشاركوا لم الخطب
لا بد نشعل سكاتنا ليلة الغضب
ونقرا فى وهج النار
.. كلام الكتب !

١٩٨٧/١/٢٠

الوصية

أوصى حبيبتي إن تبقى أم
تفتح الشبابيك في الصباح للشمس
وفي المساء للقمر الرومانسي الوردى
تضحك لما عليها يعدى
وتغنى للأطفال في ضياء الشحيح
غنوة يشنأها الريح
بمطوحها في غيطان القمح

*

أوصى حبيبتي ان تبقى أم
تخرج طفلها يلعب في تراب الزقاق
يتخاّنق مع الرفاق
يتشد شعره، يشد في شعورهم
يدخل بيوتهم .. يزورهم

ياكل الكسرة اللي ياكلوها
يبقى الطفل اللي كنته
شريد . وجايع
اللي فتح عينه على عتمة الحارة
ونور الشارع !

*

أوصى حبيبتي إن تبقى أم
تعلم الصبيان من ولادها
إن الحارة حارتهم
شبابيكها . وبيبانها
عملتها إيدى أبهاتهم
وان السنة بتدور فصول
والأرض فى الفلاحين
تحضن البذرة . تدى محصول
وان بكرة أجمل من امبارح
مهما كان قاسى وطويل

*

أوصى حبيبتي ان تبقى أم
تصاحب البنات من ولادها
تغنى لهم أغانيها
حكى لهم حكاويتها
أحنا اللي جويتنا الخواري بلاصحاب
غير العسس ورانا .. والكلاب

* *

حكى بدون دمعها ما يفّر
حكى والقمر الرومانسي الوردى
فوقها يمر
ويشوق ظلام الليل
وقتها يبان
.. وجه مصر النبيل !

*

١٩٧٧/٨/٤

حارتي ساكتة

‘إلى مدينة دمياط.. أواخر الخمسينات‘

حارتي ساكتة

مش بتضحك، مش بتبكي

وان اجاها المغنى، غنت من سكات

وان عروسة جه جوازها

علقوا لها منديلين

وإن فطس راجل بهمه

صوتوا يادوب صوتين

والشبابيك اللى كانت تنفتح على همس صوت

المسامير والبلادة فقلوها

البيان ما يمر منها إلا بصة

بصة فيها الحسرة والغیظ والتشفی !

*

الحارة دى اتغيرت
ما عادتشى حارتى
الحارة دى صابتها عين
داع لعين
ومالوش أطبا
حبة حبة . يكلموها بالإشارة
وانا ماشى فى المسا. قابلنى جارى
ضحكتة مالهاش رنين
بصته مالهاش بريق
خدنى فى حضنه بكى
سابنى وحدى ع الطريق
دون ما يسأل عن ولاده
والقمر ما اتنصبشنى فى السما
على حين ميعاده !
والولاد ليه غابوا من خلف البيبان
ماطلعوشى بالفوانيس والأغانى
خدنى فى حضنه وبكى

سابنى فى همى غريق !

*

يا قمر غايب مافوتش ع المدينة
الوجوه ان شفتها صفرة حزينة
والبيوت صالبتها موت
موت رمادى ديبه هامد
موت مهوش قدسى وجليل كما فى المعابد
إنما موت . فيه ملامح صلبة قاسية
والجواد رغم اللي شافه لسه راح
مين يراهن ع الجواد أبو ألف كبوة
مين يراهن ع الجواد أبو ألف جرح
.. وميت نزيف
مين يراهن والطريق مليان حجارة ؟
مين يراهن . ده الدبيب سامعه خفيف
يمشى السكة . وما يخافشى الخسارة ؟

*

يا قمر . اشهد ناديت بعزم صوتى

واللسان إن جف
هافتح صدرى . وأعمل قلبى شعلة
(ضلمة بتعفر طريق كل اللى رايح
خوف بيشجى . قلع مطوى . حزن بارح)
إنما الباهت فى أخانه
جواد الصبح دايسه
يا قمر . إشهد وبكرة الخلق طالعة
م البدارى زارعة أرض . وهى قالعة !

*

حارتنى ساكتة
إنما سكوت اللى عارف
مش بتضحك
إنما مين اللى يضحك يوم عليها
هى عارفة ويوم ما تملك
راح تصبح الصيحة
تفرد صدرها . وتزيح سارقها
بكرة هى تبل ريقها

يدن الديك ع الجدار
(زى ما قال قبلى شاعر)
والمشاعر هى دمع الفرح
وأغاني الحقيقة
وان قابلنى فى المسا جارى اللى عايد
ضحكته هاسمع رنينها
بصته راح اشوف بريقها
هاخده فى حضنى . ما اسيبه
وحده
واقف ع الطريق !

*

١٩٧٨/٩/٢

اسود وابيض

فاتوا الحرس

وعدوا م الساحة

فاتوا راكبين الجياد

* *

فاتوا الحرس

ولسه الشجر أخرس

النهر ساجى ، كتوم ، بلا دفقة

مفروش مر القصر بالسجاد

* *

حتى الفراش انكمش

على الزهور الحزينة

بلا رفة .

صوت الحمام انحبس

والمركبة ماشية دون هزة الدفة

والجو كله جراد

* *

هي ضروع البقر

جواها الحجرّ لين

لكن برغم الحزن

لسه دابرة عقارب الزمن

* *

إصرار وحتمى وقوة

عجينة الشعر لينة

وأيده الحنينة

وبصته نسمة

* *

ضحكة السلطان

جلجل فى عرض المملكة وجول

فرمان يقول

ان النهاردة تتنصب زينة

وتتصيح وجه المدينة

بالألوان

فاليوم بداية الأعياد

يلبس جميع الأولاد

شارة الحداد !

★ ★

١٩٨١/٢/٢٢

قلبي اتوضى

"إلى بنت مصرية بافتش عليها من ١٠٠٠ سنة بدون جدوى"

لما شفتك

قلبي اتوضى ، وصلى

وعذابي زاد فى قريك

آدى شباكك زتوني

ليه عيوني

.. تبص له دايما فى خلصة !

* *

لما شفتك

الزمن ما صبحش فارس

لمس إيدك ، كان بصدفة

كنت حاسس

إنى ماشى
بين غصون ماجحة وفراولة
أما شفتك طفلة تايهة ف ليل طويل
عود بيتفجر بمعنى
إنما فاكهه نحيل
قلتي كلمة. وابتسمتى
كانت الشنطة ف إيدى
والعفار لسه بيجرى
نفسى اشم البحر
.. اضم اليود ف صدرى
الكلام كان زى أشعارى الحزينة
ماله مرسى ف أى مينه
إنما مغسول تعب . وشقا سنين
آه يا حزن سنين أنين
النهاردة باغنى غنوة ليك ف بعدك
وانا لسه أسير مكتف
نفسى آخدك . جوه حضنى

نفسى اضم الجرح . من أعوام بينزف

المطر ببيل شعرك

أعصره ف قلبى المهاجر

ليل وقادر

نيل . وكنا جوه مركب

وقت مغرب

ناحية الشرق نعدى

والنخيل الصبح أخضر

السعف مفسول . وزاهى

يا فرح . زارنى النهاردة

راح احط ف شعرها الفاحم ده وردة

وابتسم ليها

غادرنى يا صمت سجنى

* *

الكلام عاجز على قول الحقيقة

وانا مسجون فى الشهور:.. ف أيام

.. وحتى فى الدقيقة

حب وفروعه حزينه

هل بتهزمنى اللوايح ، والقوانين الرصينه ؟

إحنا حبيننا ، وراضيين بالإدانة

من سعادته .. مين يخاف ؟

حب مش محسوب

ومش طالب يكون له إعتراف .

حب .. هوّ جه لوحده

عدى حاجز

لسه حاجز جاى بعده

* *

زى وردة تفتح العين فى الصباح

تلقى النداء فوقها يقطّر

حتى أكثر

آه يا قلبى نفسى تهدى

إهدى واتكلم بفعل وروح ومنطق

بص للشمس بتشرق

وارسل النورس يجوب فى فضا البيوت

بيتها فين ؟
انت وحدك . تعرفه لما تقوت ..
لما توصل
تلقي زهرة مفتحة . وشمس هلة .
دى حبيبتي
روح وهات منها ابتسامة
بكرة شايفه جاى أحلى
آجى .. ولا
ياللى قريك لما يبجي الصهد
- واحلف - يبقى ضلة !

*

١٩٨١/٢/٢٠

عفار الخنادق

- فى الخندق
- صور من سيناء
- وتندق قلوب العصافير
- اللعبة

فى الخندق

” القدم جنب القدم

والعين مصلوبة

الدم صبغ العلم

والصدر متقوبة “

* * *

فى لحظة الدانة بتهرش فى دماغ الصمت

قمت

خدتك حببتي فى ضلوعى

وخوذتى فى ذراعى

عارى الدماغ والحس

باجرى وقدمى يتعتر . وازحف

كل الزمايل بيفكروا فى البيت

(أبو الفتوح) فى المرة الحيلى

والولادة والمخاض والجأى
شأيل على دماغه سبع سموات
و (حجازى) فى الأم الحزينة
على ولدها فى حرب عدت
الحرب تاخذ . والناس ما قضت
وانا بافكر فيك
وانغمس فى الفكر وعنيا بتدمع
أفكر فى الضحكة واللمة
أتسمع
صوتك خافت خفوت الشمس
جوايا كالأعاصير
وانا بافكر
فى اولاد حوارينا الغلاية
اللى بيجروا ع الجناطير
فى ابن الأجير
وابن الفقير
اللى التوتاية مرضعا هم م الحكاوى الصبر

واللى حسرتهم بتجرى فى دماهم
وف حلقهم بطعم الصبر
بافكر فى عيال الصعيد السود
فى البيوت الحجارة
ونشفان العود
فى بهانة ومحمود
فى فتحي وام السعود
اللى الحدود غايرة
رغم مكنة الطحين دايرة
ترمى الغلال دقيق مدروس
ماشفته يوم يتمضغ تحت الضروس
بغموس !

* *

بافكر جناين بكرة تبقى لين
وامتى نكستر الزنازين ؟
ونطير نوارس الرزق
تونس مراكب الصيادين

وهل نعود بكرة نمشي ع الكورنيش
هل ما أرجعش
يَعقل .. ولا نغنيش
يا شمس السنين البكر!

خدتك - حبيبتي - في ضلوعي
وخوذتي في دراعي
خفيت عن الزمايل كل أوجاعي
وقالتي (سعيد) :

” بنتي (منى) الأجازة الماضية

خطت خطوتين في البيت

ياريت أوصل أشوفها

وارجع قوام ! ”

(عبد السلام) صامت

تقوم الدنيا على حالها

عنها ما حطت ولا نامت :

” سيبك بلا سينا بلا غيرها

اللى عايز يزرع فيها

يبقى بعدى لها
ياخدوها .. ياخدوها
مش هي رملة زى اللي احنا فيها
تغور بلا دوشة !! "

* *

كان الكلام ده من ورا قلبه
لإن الباشجاويش (عبد الجليل) قال له
عن الشهدا .. اللي جنبه
وقعوا فى الحروب الماضية
وحكى له ح الصول (فريد)
على كل أشجانه
وكان ساعتها بيجز على لسانه
وكانت اسنانه
بترتعش رهبة
يدفن نظرتة فى الرمل

* *

إحنا بنكره صحيح الحرب
لكنّا بنكره أكثر كل جارهنا

واللى ببينوا من وراها قصور
ويلبسوا بدل السهر غالية
من عرق اللى مش لاقيين
.. بفتة ولا دمور
اللى ببينوا بيت ميت دور
من دمنا .. إحنا الفقارى
من عضننا المرمى فى الصحارى
تتقل خزنهم الحديد .. فى أوربا واميركا
واحنا نكون الضحية
لو العساكر تعرف
تنطفى كل الحروب الجاية
تزهر جناين السلام
وتدفى الفرشة !
* *
الغربة وحشة
وحين ما الليل بيضمنى باعطش
للملامح النبية
والصوت المستحي . والإيد

بتنمذ خجلى . والمواعيد
أنا باحب الزهور . والبحر . والعصافير
زيك تمام
باكره الدانة والصاروخ والموت
الرمل الكئيب
والصوت
.. لما ببيجى ومعاها الكفن والقبر
الشمس فى "الوحدة" دى قاتلة وكُفر
وأنا هنا ع الرمل
لا فى ضلة ولا كُفر!

* *

مع الزمايل فى انتظار الحرب
(أبو الفتوح) إيده لم تفارق خده
و (حجازى) خلانى كتبت جواب
وفى انتظار عشرين م الشهر
لجل مايقبض . يشتري "بوستة"
ولا يمدش إيد
و (سعيد) بيحكى عن "منى" بنته

لون الضفيرة
والعينين
والصوت
و (مصيلحي) مات من قيمة يومين والده
بعتوا له تلغراف . ومانزلشي
فرت دموعه العزيزة
بلت الرملية
وانا هنا بلا صفصافة أو ضلة
الريق ملوش قلة
باقابلك كل يوم . واحكى لك
طالت الغربة
فى الميعاد . بأجى . واغنى لك
واقعد على جيبك
وامسح غفار الانتظار !

* *

١٩٧٥/٧/٢٠

الحسنة

صور من سيناء

(١)

هو نفس الرمل الاصفر

تغرف الكف المشقق

.. يتملى شظى وبارود

هو نفس الرمل بارد

يدبّل الجثة . يمص العود

وهو

هو نفس الرمل وهجه

يلسع الوجه الودود

زى رمل صحارى ياما

إنما أصل اختلافه

يوم ما هتقوم القيامة

منه يُبعث نص شبان الكنانة !

(٢)

انزع القدم المسافر
وان نهجت . اتعب . ومد
.. وقوم . وعافر
إمسح التعب الذليل
من وش آلاف العساكر
إنزع القدم الثقيل ثقل السنين
والعرق من ع الجبين
إمسحه . والفاخرة قولها
وان تذكرت " ياسين " رتلها . قول
حت منك عمك المقبول .
فى أول حرب قامت
جنب قدمك إبن عمك
بين راقات الرمل صامت

* *

أبه تشوفه إلا رقعة من صفيح
ختها مات الجريح

مات في قلبه رعشة الإيد في المسا

تمسح على شعر الوليف

آه .. يا رمل نضيف نضيف

أمسكك . جرى . تسرسب

أحكم القبضة

بتنزل بين صوابعى خفيف خفيف

آه .. يا رمل نضيف نضيف

فيك باشوف دم ابن عمى

توب مراته الكحل يوم ما خبره

.. جمّد الساعد . ودمى

والعيال الخمسة بعيون تايهة تسأل

عن شتا الصيف

وأزهار الخريف

أعشقك أم أكرهك

آه يا رمل نضيف نضيف !

(٣)

يا رفيقى اطوى الخريطة
اطوى ألوانها الزّمية
واقرا فى الصفحة المميّنة
اطوى أوراقها بلونها البحرى الأزرق
والمراعى السندسى الخضرة .. الزتوني
الصحارى الصفرا أغنى م الذهب
الورق ف إيدك يغالطك

* *

هل عنيك وقعت على جثة شهيد
هل لحت الأيد بتتصلب على المدفع
وتخرس
والنفس م الصدر يخلص
والعيون مصلوبة ع الشمس الجريحة
المواويل الدبيحة
هل سمعت الآهة واحة مستباحة

بين ما يغطس الطير الحديدى
جاية . راحة
يا رفيقى اطوى الخريطة
لما ماتوا رفاقى
كات الموتة صعبة مش بسيطة !

(٤)

تنفجر دانة هنا
بيت يتنقل آخر الصعيد
منجلة غلة بتسقط فى العيدان دى
ينشف المحصول . ويَزرق الوريد
تنفجر دانة هنا
يطلعوا النسوان فى كل خميس بجود
يلطموا الصدر المكرمش . والحدود
كان رضع منه
خدوه الخدمة . ما الحفشى يعود
يلطموا الصدر الطرى

- " بعد غيبتك يا حبيبي
الليالي الحلوة صبحت سود "

تنفجر دانة هنا
يستم ولد سايق المواشي ترعى فى البرسيم
.. ويصبح رب عيلة
تبدأ الليلة حكاوى " عقلة الصوبع " هزيلة

تنفجر دانة هنا
يتملى جيب أمريكانى بالدولارات الكتيرة
ويزيد رصيده
يفتنى أكثر
ويقدر يشتري ناطحات سحاب
سيارات فارهة . يرافق حسناوات
من تمن دم ابن عمى
وابن عمك اللي مات !

(٥)

لما صبح الريح . رد منى بالحيا
كنت جوه الحفرة باحلم بالضيا
بالضفاير . والرغيف
بالربيع يطوى الخريف
بالجنائين . والزهور فوق العتب

كنت باحلم
بالوطن لام جراحه
بالحياة لأولاد صحابي اللي راحوا
طال بي حلمي . وفي الصباح
لما صبح الريح . ردمنى بالحيا
شلت بكوزيكي . ورميت
التقيت الصحرا مش هي ..
.. اللي انا امبارح عارفها
فيه شهيد إتعرى
ريح بتشيل هدومه

أربعة زمائلي . غطوه ردم
قال أصغر مافيهم
يا ترى راح يندفن كام مرة تاني ؟

١٩٧١/١/١٠

أبو وقفه - سيناء

وتدق قلوب العصافير

"إلى الإسكندرية : بحر وبنات"

(١)

العيد بالونات . زغاريط . حواديت خضرة

دمع الأيتام

الحرب انفجرت صابت أرزاقهم

ابكى ع البيت اللي انهض ومال

ولا ابكى روح أمواتهم

بكانى الطفل وكان يبشاورع المراجيح

ما املكش حصان الريح

الكلمة صبحت من غير جناحات

نقش فى عمدان الصخر

دفاتر الحوانيت

حنيت للكلمة الطلقة

وللحرف الدم
حنيت للهجة الأم !

(٢)

البالطو افرو الجاى م القطب
الشال الأسمر قلب الحازين
أنا فين : بين البتارين العطر
وبين بيتها المنقوع فى الطين

* *

أول ما طلعت "المثرو"
أتخبطت إيدى ف نهدينك
وفتحت عيونى دهشة
وسكت استنظر تعنيفك
ميلتى على وسط الخلق
كانت ف إيديكى وردة
منزوعة الأوراق والضى
وأدى ساعة فانت

من لحظة ما نزلنا
مشيناع الرصفان فى الحى
غنيتى وكنت اتصنت قلبك حزنان
خجلان
ده اليود شميته على شط الشناطى
نشفت أشعارى فى كتبى
وتركتك من غير ما اديكى العنوان !
أو أحكى قصة موتى
وسكوتى ع المكتوب !

(٣)

الإيد البضة مرصوصة خواتم
ومياتم فى خميس الرحمة
حسنه للمرحوم
محروم م السوق
مقفولة فيه البسمة . والدكاكين
- أنا ابنك يا اما ولا ابن حرام ؟

وحرام الخوض فى العرض
وسيرة الناس
ونزلت البحر . ارزق الرب ف عيني
وحينى لبكرة اشتد
اترد الباب المفتوح
واتمدت إيد حطت على بقى كمامة
يا حمامة "نوح"
مررت ع الباب ده ياما
باستنى مجيك
وساعتها بترد لجسمى الروح !

(٤)

أنا من غير عم ومن غير خال
نخل بيتهز ما ينزل منه التمر
الخر هرانى
دوخنى اليوم مقتول البركة
مهدود الحال

قدمى حطيته على أول عتبة
جاء من غير أحمال
سرقونى التبر ، المسك ، الخز ،
حرير الهند ، وجيت بطال
خبّطت بكفى على أول باب
نقرت طاقات البلدة
رد عليه سكات
يظهر إني فى مدينة للأمموات !

(٥)

الرب ادانى "الصبر"
وخذ أسماء تسعة وتسعين
الباطو الفرو الجاى م القطب
النشال الاسمر : قلب المحازين
وانا فىن خطوى وطريقى
ريقى ما يتبلّش بالكلمات
الكلمة صبحت من غير جناحات

أنا خدت البحر دليلى
وليل زوارقه من غير مجاديف
أنا كفى صوابعه جيلة . وعصافير
نوافير . طوابير عسكر . تزرع ماتموتش
أنا شفت العش القش المهذوم
فأمنت بصدق اليوم !

(٦) .

الليل عش نجوم السموات
اتعتر الصمت ف ودنى
بنباح الكلب المرعوش م الجوع
وبدق قلوب العصافير
لو اقدر اطيير
واشتال على طرف جناحي حمامة نوح
لو اقدر اخلى النوح
.. ضحكات
لو اقدر ادري كلامي

والله سنابل قمح وشمس
قمر عطشان
ينابيع . ألحان
ورايات من فوقها رصاص خرير
لو اقدر اطير!

(٧)

من همى وشيّلت حروفى خطيئة الكون
أنا أدرك إنه جنون
توهنى الحزن الساكن جوه جفون الأيتام
دوخنى الصوت المتلون
والحرف المبتور
النور آتى .. النور
بنورة الساحر وعصايته الأبنوس
التتر . الفريس . الروم . الهكسوس
وحوافر خيلهم على صدرى
صدرى هبطان

أنا وسط ضجيج الناس همدان

أنا وسط الزحمة غريب

وف عز بؤونة بردان

البرد ثقيل ، والليل يا اصحابي غطيس

غطوني بحرف

بكلمة

بكل معاني القواميس !

*

١٩٧٤/١١/٢

مركز تدريب المشاة - العادي

اللعبة

للوطن دمي

وع الأرض السلام

الحروب

بتجوب أراضى الكون تطوف

فوق عواميد المعابد

تطمس المعنى وتنشق الحروف

تخدش الكلمة / الحجر .. من غير زمان

والحكمة مقطوعة الأيادي

ف وشها قافلة الببيان .

* *

طيف المجاعة

خش قاعة ..

.. مكيفة علشان يموت

كسر التابوت

وخرج ببطن وسبعة . ماقدريش يفوت

* *

نام الأفارقة

ع النجيلة اتبست

نخ الجمل . وطب مات

وكان (روبرتو) هناك بعيد

يعيد على رفاقه بطولته من جديد

طيار ف فيتنام . طار ودار يصنع غارات

ولما اتعانت على المعصم عقارب الساعة

ارتعشت إيديه

قام من سكات

ولع سيجارته بـ (مارك) شفته مش جنون

اتفحمت ابنوسة في الأمزون

و (جون) ..

حط النيشان على بدلة السهرة برق

خطف العيون

فى الحفلة خاصر بنت وحكى لها الى كان

” سريى الجعان

اتغدى يوم

بمدينة سكانها م الأقرام “

ونام

على كتفها

صحت المدينة تبني ما بإيده انهدم

وتدق أجراسها : سلام

*

للوطن قلبى

وع الأرض الحبة

كل دبة نملة ع الأرض حاسبها

نورس البحر نشف . الموج طواه

ارتفع صوت ملاحين البحر .

مواويل صبر فارغة

خوخت منجاية ع الشط . انحنت

هسهست نسمة . بكت

إنما الشمس ف ميعادها نُورَت
فِي الغروب - برضه - اختفت
شفتها بتغوص حزينة
زى خنجر شق فِي ضلوع المدينة .

*

للوطن نفسى
وع الأرض العبيد
شفتهم بعيون جريئة . من جديد
الملاحق قاسية . مَزَّق الوريد
الحناجر راعدة . رافعة ميت شعاع
(الرغيف . الحب . الكلمة . النهار)
شفت كلمتهم بترجم لغات
شفتها شابة وشجاعة
شفت كلمتهم فِي قلب القاعة
رجاها .. ما بين النافورات
بعيد ع الفاترينات
شفتها بين الشفاف مينة

وسط قهوة العواجيز مِباعَة

*

لما فى الضلّمة تدور اللعبة

ينساق الرجال

- لو تشوف - قطط وليدة مغمضة

" اضرب فى صدره قبل هو ما يضربك

وموته قبل ما ييجى يموتك

ويفرتكك

ولك حقيقى الفخر والمال والخلود "

تعمى العيون

زى ما تكون خارجة م الضلّمة

.. لضى بدون حدود

تضرب الصفارة إنذار

بندقيتك طلقة . والمدفع دانات

يبتدى هنا الموات

* *

ع الموائد البعيدة

يحسبوا اللعبة النهاردة جت بكام

م البشر . والدولارات !

*

للوطن روحى

وع الأرض الحياة

طففت فى الدنيا باغنى للجباة

فوق بترفعتها السواعد طالعة نازلة

السواعد اللى ماتاخدشنى وبازلة

طففت . شفت ف كل بلدة مغنى زى

بالكمنجة يغنى لزهور الفراولة

كنت وحدى بنص إيد

كنت وحدى بنص عين

كنت اغنى بدون شفاه

سرت من غير قلب

أبحث عن مفاتيح المدينة

ع الحقيقة . كفى دق كل باب

*

فلتكون القسمة عادلة

تشرب الكلمة الحقيقة ترتوى

وامشي وسط الشعرا

صناع الدروب

شمس بازغة

مش غروب !

*

١٩٧٦/١/٢١

أبو وقفة - سيناء

طلة من الشيش

- السويس ٦٩
- كرسى فاضى
- غضب
- رقصة
- زقاق قديم
- مطر
- نور
- شك
- متهم
- شعرة بيضا
- فدان شطة
- فستان
- الخفيف
- ماركيز
- ناس
- مناخوليا
- حادث عرضى

الدم مغرقنى

من صابع رجلى لراسى

بالقط بصعوبة أنفاسى

وأمر بصوابعى على لحم الحيطه

بازحف . وصراخى مالينى

بدون أى حذر أو حيطه

أنا شايك جسم مدد

فى الخفرة اللى قصادى

الموت أقرب من حبل وريدى

مش قادر اخطى بقدمى

أو أمد له إيدى

لكن لما صرخت : يارب .

سمعت صدى أنفاسى

فريت دفتر إمبراح
فلقيتني مرة مدبوح
والثانية ع الرقبة السكينة
حطت ع القلب سكينة
لما عرفت ان المدفع اللي قاصدني
أضيق من إنه يموت كل الناس
أغبي من إنه يحصى ..
.. جميع الأنفاس
وضحكت بهرارة
لما المدفع ١١٥ مللى ..
.. كان يرمى قنابله
من تاني ع الحارة !

*

كرسى فاضى

ماقدرشنى قلبى يحبس الفيضان

كل المواسم داخله توارىخى

وآدى كرسى فاضى

ع الشطوط قلقان

واقف .. وباستنى صديق

الموج طواه ولا الغياب

سمان ولسه بيتحذف

يطويه شبك

مين أغضبك

يا بحر .. بتكون مصيدة

لازرق بينده للحبايب

جل لحظة من لقّا

والريح يمسح خد ربح الرمل

بيقول كلمته .. ومن سكات

بيطوح الكرسي الوحيد

وييدفنه ويا القواقع والصدف

وبعد شهر من الغروب

.. بيكون غياب

هو كده برضه

الجروح تتداوى

وأنين العذاب ؟!

*

غضب

غضبان كعادتي

في شنطتي غيارين ومشط

وميت قصيدة

وحلم كحلي

ريش حمام . ووردة بيضة

* *

غضبان كعادتي

وف انتظار قطر السفر

بيوت كتيرة بتراقبني

والشبابيك بتعاتبني

إنما مفيش رجوع

محتاج - ومن تاني - أجوع

أرجع أحس القلق
وأجرى على اللقمة
ويغسلني العرق
ويهدني - بالفعل - مشوار التعب
غضبان
عشان انا من زمان
نسيت صحيح طعم الغضب !

*

رقصة

"إلى السيد التماس.. بلا مناسبة"

جوه ضلوعى طيور وبتحب الغنا

.. والزقزقة

أنا نفسى أرقص .. مرتين

واخرج من الأود ..

.. اللي لسه ضيقة

رقص يخطى ع البحور والأفدنة

رقص يصب بهجة

.. ف أيام السنة

لكنى فعلا بانكسف

باخجل

.. وادارى نزوتى فيك ياورق

ياللى نزعيت سرى منى

خليته علن

* *

وادينى بادفع التمن

أدخل فى شرنقتى اللى قد البندقة

ولما بيفيض بى

أرجع واعترف :

جوه ضلوعى طيور

وبتحب الغنا

والزقزقة !

*

زقاق قديم

بلاط مربع فى الزقاق
وبيت بيتسند على كتف الزمن
لما باخطى
قلبي والله يرجف
هنا حبيت .. وبكيت هنا
حبيت . وماكرهتش فى يوم
” عبده “ الحسودى دكانه ماعادش ليه أثر
وده كان ببص البصة ..
.. يجروا يبخروا
.. بعد ما ياخدوا من كُمه أتر!

* *

شباك ومفتوح من سنين

لا عاد على المنشر هدوم
ولا كلام
بافوت وبارمى ع الحيطان
بالإيد سلام
أشعر بإنى انتمى لعالم قديم
مليان دفا
كله حنين
لكن الفؤاد اللى سكن
والضحك اللى يمر فى عبابة الزمن
ليه بيخابلنى بالاشتياق
بلاط مربع فى الرقاق

*

مطر

"إلى أنيس البياض : شعر بلا حدود"

حس المطر ع البيوت

وانا حسي جوايا

حاسس كأني باموت

وبارد الآية

وحيد برغم الزحام

القلب بارد رخام

ألى بيصحي

.. وانام

في الخلق غُصة وحروف

* *

حس المطر محزون

بللّ في ورق اللّمون
والريحة هلة علينا
ساوى الألم يا أخيننا
وان تنده الشمس علينا
لنرد غول الموت
ونقول ما عادش سكوت
هاتى الحرق .. والطسوت
وتعالى يا داية !

*

نور

وباحب النور

العصافير

.. على جبل غسيل منشور

تنهيدة بيع العسلية

بتطلع رابع دور

وباحب حاجات مش ممكن أذكرها

وحاجات ثانية باقولها

فى قصايد

تسبقها المارشات النحاسية !

* *

تمنعنى المسافات من قول الشعر

خبسنى الكلمات

.. بين قضبانها
وبيوت أصحابي لسه فاخة أبوابها
تغمق الحارة كل ما اقرب منها
وتغمض عينها
ساعة ما أبص لبناتها وصبيانها
ده لإنى بتأمل
.. تقاطيع الوجه بحبور
وباحب النور!

*

شك

زمان غرقت فى بحر اليقين
كنت أظن إنى أعرف كل حاجة
واستكين
للمعرفة الضريرة
والحقيقة .. اللى ما تعرف زلزلة !
ولما جف نيلى مرة
وبعد مدة إتلى
حاصر العقل كتير م الأسئلة !

* *

خبط شمسنا
كنت أعرف مبتداه
.. من منتهاه

دلوقتى تايه فى الخريف
يتوهنى السؤال ما بين بداية الألم
أو نهاية الآه !

*

كل البنادق
مصوبة على قلبه
كل الرصاص
ناوى يسكن جتته
مين فيكوا يعرف تهمته
ومين يقيم له محامى
ينفى عنه الإتهام ؟

* *

كل المواسير الحديد
مصوبة بإحكام
الشخص ده له ملامحى
وأكل من نفس شعيرى وقمحي
حتى التجاعيد على وجهه

تدلك على إنه من ألف عام

لم نام

* *

كل البنادق

مصوبة بإحكام !

*

شعرة بيضا

"إلى د. عبد صالح.. طبيب لنصف الوقت..
شاعر لنصف الوقت."

شعرة بيضا

بتضحك للسواد ، وتستخبى

بتكشف تقل الزمن

حبة بحبة

* *

لما بص فى المראה

قلبه انقبض

شافه ابنه اللى لسه بيحبى

شد رجله ، لكنه ماضحكشى

وشىء جواه الجرح

فى امبارح سرح !

* *

وقتها افكر صحن المش

والرغيف اللي يملئ طبلية

قعدة الارض ..

وعيدان الملوخية ..

* *

استدار للجدار

لقى صورته بتضحك

بدون سنة ذهب

والابتسامة

زى لبلاية وشادة

شعرة بيضة .

بتعافر

وتضحك للسواد

وبتستخبي !

*

فدان شطة

شنطة

وفيها وردة من ديسمبر

لسه جواها عبير

و "عبير" دي بنت عرفتھا

وقعدت وياھا زمان ع الكورنيش

شربنا عرقسوس

وماكانش ويانا فلوس

فأكلنا ترمس

وانطلقنا عصفورين

* *

بعد عامين

أنا شفتھا

جوه سجن اسمه الزواج

وفدائين شطة حوالها

وبنوار من زجاج

فعرقت إن القصة ..

.. داخله ع الختام !

*

فستان

فستان أحمر
لونه بلون الدم
لونه بلون الورد الجورى
وماتسألنى أبداً عن دورى
فى المشهد اللى هتشوفه الآن
أنا أبقى الشوك
.. اللى حوالين الأغصان
وماتيش المية اللى تندى
.. فى الصبح العطشان

* *

فستان أحمر
وخجل ع الخد رقيق

مستعجل ليه يا زمن . خليك إنسان

إستنى لما اتلّى ف ملامحها

الوردة أو البنّت

الذكرى أو الكلمة الحلوة

اللى انا بيها آمنت

* *

فستان لَوْن يومى

وعرّى خيابتى

أقدر أقول إن ده آخر لحن

فى ربابتى

أو آخر خيط فى الفستان !

*

الخفيف

باحسد الأميين
لأن الكلام لسه عندهم غامض
أما كلام المثقفين
في كل ندوة تلقاه حامض حامض
والأزمة مش في الحروف
أو ترتيب الألفاظ
الأزمة في النفوس

* *

فيه ناس بتشوفك حيران
تعزم عليك بكباية عرقسوس
وناس تشوفك عرقان
تزقك لنار جهنم

أو تنخر في سيرتك : سوس !

* *

باحسد الأميين

في يقينهم العجيب

وباضرب كف بكف

لا انا قادر ابقى زيهم

ولا انا قادر أقف مع المتعبيين ثقافة

.. في نفس الصف

دلوقتي أقدر أعرف

ليه "نجيب سرور" عقله خف !

*

ماركيز

كان فاح بيته

ومقضى كل مطالبه

ومسدد تأمينه وضرايبه

ومزكى

.. قبل عشرة من رمضان

والناس عارفينه .. إنسان

ماشى بما يرضى الله

والحكام

والحزب اياه

الحزب اللي هو أمينه

وعلى رأى زميلى "محروس"

هو برضه مش واخذ على أكل العيش الفينو

دوغرى

ومحافظ

.. على أحاسيس الناس

وف مرة بعد ما نام واتغطى

وجدوه - الناس - تانى يوم

نسيناس !

*

ناس

الناس هتمّوت بعض
والأرض بترمي الغلة ببغض
الأبريق : المية بتغلى جواه
وكتاب متزين بالرسومات منفوخ بيهاه
الطفل يئن . ينطق الشيخ أه
وغبار بيطوف على كل مدينة
وأدى بنت رقيقة
.. على أناملها بتعض
مش راضية تبوس الورد
أو تركن على إفريز الشباك الخد

* *

الناس هتمّوت بعض .

علشان ماتعيش فى رخا وبحبوحة
مش عارفة ان النكلة اللى كانت قضة
صارت بإيدى الخلق مسبوحة
دى مصاير وحكاوى أقرب للقهر
وف أول أيام الشهر
بياع الروبايكيا بيفوت
والخس بيوطى جنب منادر بيت متنكس
لما يبعد بيلقظ ثانى القوت

* *

الناس هتموت بعض
مع انها خرص دايماع الفرض
وتشاورع الناشز
وبتطلب دبحه فى العلنى والسر
وبتخلط الطين بالتبر
وتعلق يافطات عن فضل البر

* *

مش عارف

ليه القلب المتحجر

مش راضى يلين

النفس المتسامحة ازاي يخفوها عن العين

مع طول النظرة بتتخض

والناس عايشة .. مع بعض !

*

مناخوليا

صاحبى د هوہ

آخر مناخوليا

اجوز تسعة

أربعة ، فاربعة ، فواحدة

لكن بعد المشوار إياه

لساه حاسس بالوحدة

والسر إنه كان فاكر النسوان فراديس

أو بساتين فاكهة

فأصبح هو "الميس" !

دلوقتى بعد طلاقهم

وقَّعاده لواحدہ

اتفرَّغ للعمل الحزبى

والتنظيم

- مش تنظيم الأسرة ..

إنما تنظيم الجماهير -

ويسافر - ويا أوراقه - أبعدا مشاوير

وأخرها فصلوه

بعد ما كان آخذ كارت مبايعة

والحجة :

إن كل الأعضاء اللي استقطبهم

كانوا نسوان ..

.. م الفراديس الضايعة !

*

حادث عرضى

البننت دى من غير نهود
أو بالبلدى بزاز
والقصّة دى من غير حبكة
أو لحظة تنوير
أما القصيدة اللى هى عجينة ف إيدى
فمش عايزة تطلع برؤية أو ظل خطاب ؟

* *

لذلك أنا فكرت أغير البننت بالقصيدة
وأبادل النهود بأول ٣ سطور ..
.. من القصّة !

فما رضاش الرقيب اللى جوايا
ولا صاحبى الناقد .

.. اللى بتضارة إزاز

فخذت بعضى

وقعدت اتشمس من ورا لوح

.. بيكشف لون البحر التركواز !

* *

وفجأة لقيت البنت معدية

بدون حبكة

والقصة بدون بزاز

أما القصيدة اللى انا كنت ناوى اكتبها

فكانت متاخدة خرى

وف إيدها الكلابشات

رحت وراها بحس فضولى

مسكونى

سألونى : الحبس أو الجواز !

*

الفهرس

7	الاهداء.....
9	* نتهجى الوطن فى النور.....
11	أوراق منسية.....
17	الأرض : فاس جديد.....
23	وطن.....
27	شاهد.....
33	أغنية حب.....
45	* رسائل منقوشة على جبين الولاد.....
47	ندا الأرض.....
53	الرحلة الأخيرة.....
64	اعتذار لسليمان الخلبى.....
75	عطش البرتقان.....
79	خصومة.....
85	سكة حضارة.....
89	غنوة الطباشير.....
97	* نقاسيم الحزن والفرح.....
99	بتارين.....
105	شعاع.....
110	الفكرة.....
119	الوصية.....
122	حارتى ساكتة.....
127	أسود وأبيض.....

130 قلبى الوضى
135 * عفار الخنادق
137 فى الخندق
145 صور من سيناء
153 وتدق قلوب العصافير
161 اللعبة
169 * طلة من الشيش
171 السويس ١٩
173 كرسى فاضى
175 غضب
177 رقصة
179 زقاق قديم
181 مطر
183 نور
185 شك
187 متهم
189 شعره بيضا
191 فدان شطقة
193 فستان
195 الخفيف
197 ماركيز
199 ناس
202 مناخوليا
204 حادث عرضى

رقم الإيداع : ٧٣٦٤ / ٢٠٠٠

شركة الأمل للطباعة والنشر
(مورافيتلى سابقا)